



KOPI PAHIT

Jamiyah telah memutuskan tidak mau menyertai Muktamar Pertubuhan Muslimin Singapura, sebab muktamar itu diadakan tanpa berunding lebih dahulu, dan

menghendaki semua orang hanya, sekali lagi hanya, menyertainya sahaja mengikut aliran yang dialirkan oleh kertas kerjanya yang ditulis oleh Yang Dipertuanya

U. Ya‘acob Mohamed. Harus juga barangkali orang-orang

Jamiyah sudah faham gembar-gembur bung Ya‘acob dalam gabungan empat pertubuhan dahulu yang sekarang tidak ada khabarnya. Bahkan daripada gabungan gembar gembur itu Bung Ya‘acob dapat gelaran ((Bapa Pendamai)). Sekarang orang harus akan bertanya nanti orang-orang penyokongnya akan bilang bahawa dia ((Bapa Pembela Islamkah?))

Mā-shā Allāh – riwayat undang-undang Islam orang masih ingat lagi bung!

* * *

Syed Ahmad Dahlan Naib Yang Dipertua PAS Singapura dikatakan telah menyatakan bahawa PAS dalam mesyuarat jawatankuasanya telah memutuskan tidak menghantarkan wakilnya kepada Muktamar Pertubuhan-pertubuhan Islam Singapura anjuran Pertubuhan Muslimin. Tetapi setiausaha Syed Junaid bikin *circular* lalu menyatakan bahawa PAS akan menyertai Muktamar itu. Oleh keputusan itu maka Syed Dahlan akan meletakkan jawatannya bukannya sahaja sebagai Naib Yang Dipertua PAS tetapi juga sebagai ahli biasa PAS. Sebabnya kerana keputusan yang telah dibuat boleh diubah-ubah yang ertiya PAS Singapura tidak mempunyai perdirian – syabas Syed Dahlan.

Ramai sungutan timbul ke atas dua buah harian Melayu yang ditulis Rumi dan Jawi kerana kononnya kalau ada orang-orang yang menulis tidak setuju atas sesuatu tidak disiarkan tetapi kalau bersetuju terus dibesarkan terutamanya kalau perkara itu ada kena mengena dengan orang-orang ((gadai)). Memang begitulah kerana kalau tidak ampu bung ((gadai)) perniagaannya akan susah jadinya . . . suara rakyat dijual!

* * *

Orang Itali mau buat filem Nabi Muhammad. Kerajaan Pakistan membantah. Orang-orang Malaya? Belum terdengar lagi. Mengapa? *Wa Allāhu a’lam.*

* * *

Datuk Syed Ibrahim Al-Sagoff yang telah menjadi Yang Dipertua *Jamiyah* selama lebih daripada suku kurun telah meletakkan jawatannya apabila beliau gagal daripada mempengaruhi ahli-ahli jawatankuasa *Jamiyah* daripada menyertai muktamar yang dianjurkan oleh Pertubuhan Muslimin Singapura, langkah beliau diikuti oleh Naib Yang Dipertuanya, Tuan Haji Muhammad Khan. Orang merasa langkah yang diambil oleh Datuk Syed Ibrahim adalah kurang bijak kerana kemahuan menyertai Kongres itu adalah kemahuan jawatankuasa sedang beliau sendiri tidak ada kena mengena dengan Pertubuhan Muslimin. Bersalahan Tuan Haji Muhammad Khan sememangnya beliau adalah juga anggota Jawatankuasa Pertubuhan Muslimin dan Naib Yang Dipertua pula kepada *Jamiyah*. Jadinya Tuan Haji ini berkeadaan seperti pisau dua mata. Jadi orang *Jamiyah*, dan jadi anggota Pertubuhan Muslimin. Keberhentian orang-orang seperti ini patut bersyukur kerana orang yang bekerja dua lawang harus boleh disebut pula dua muka.